

**BOSNA I HERCEGOVINA
FEDERACIJA BOSNE I HERCEGOVINE
TUZLANSKI KANTON
OPĆINSKI SUD U TUZLI
Broj: 32 0 St 400011 21 St
Tuzla, 22.07.2021.godine**

Općinski sud u Tuzli, sudija Antonela Đaković, kao stečajni sudija, u postupku prethodnog ispitivanja prijedloga za pokretanje stečajnog postupka nad dužnikom „CPM BH“ d.o.o. za građevinarstvo i poslovni inženjering Lukavac, Partizanski put bb, dana 22.07.2021.godine, donio je sljedeće:

R J E Š E N J E

POKREĆE SE PRETHODNI POSTUPAK radi utvrđivanja uslova za otvaranje stečajnog postupka nad imovinom privrednog društva „CPM BH“ d.o.o. za građevinarstvo i poslovni inženjering Lukavac, Partizanski put bb, matični broja subjekta: 1-11396.

Za privremenog stečajnog upravnika imenuje se Alisa Bijedić iz Tuzle.

Privremeni stečajni upravnik dužan je odmah po prijemu rješenja o imenovanju preduzeti radnje utvrđene odredbom člana 16. Zakona o stečajnom postupku, a naročito:

- obezbijediti imovinu dužnika i starati se o istoj,
- izvršiti pregled dužnikovih poslovnih prostorija i izvršiti uvid u poslovne knjige i dokumentaciju dužnika,
- utvrditi da li postoji razlog za otvaranje stečajnog postupka,
- ispitati da li će imovina stečajnog dužnika pokriti troškove stečajnog postupka,
- utvrditi da li se poslovanje stečajnog dužnika može u cjelini ili djelimično nastaviti u toku prethodnog postupka i
- uraditi kontrolu poslovanja stečajnog dužnika.

Privremeni stečajni upravnik dužan je podnijeti svoj pismeni izvještaj ovom sudu u roku od 30 dana od dana donošenja ovog rješenja u kome će izvijestiti ovaj sud o preduzetim radnjama i iznijeti svoje stručno mišljenje o tome da li postoje razlozi za otvaranje stečajnog postupka, odnosno da li postoje bilo kakvi izgledi za nastavak daljeg poslovanja dužnika.

Mjere pojedinačnog prinudnog izvršenja pokrenute protiv stečajnog dužnika se obustavljaju, izlučna i razlučna prava povjerioci ne mogu ostvariti u predhodnom postupku, stečajni dužnik ne može raspolagati budućom stečajnom masom bez saglasnosti privremenog stečajnog upravnika i suda, a sve to u cilju osiguranja buduće stečajne mase.

Rješenje će biti objavljeno u „Službenim novinama FBiH“, te se pozivaju povjerioci da privremenom stečajnom upravniku bez odlaganja dostave prijedlog mjera osiguranja na predmetima stečajnog dužnika koje će eventualno zahtijevati.

Ovo rješenje će se dostaviti Odjeljenju registra ovog Suda, Zemljišno-knjižnom uredu Općinskog suda u Lukavac i Službi za geodetske i imovinsko-pravne poslove Općine Lukavaca, radi upisa zabilježbe otvaranja prethodnog postupka.

O b r a z l o ž e n j e

Predlagač „CESTNO PODJETJE MARIBOR“ Družba za gradnju in vzdrževanje cest d.d. u stečaju, Slovenia, putem punomoćnika, podnio je ovom sudu dana 21.04.2021.godine prijedlog za otvaranje stečajnog postupka nad dužnikom CPM BH d.o.o. Lukavac.

Stečajni sudija nakon što je utvrdio da je prijedlog za pokretanje stečajnog postupka podnesen od strane ovlaštenog predlagača u smislu odredbe člana 4. stav 1. Zakona o stečajnom postupku i da je isti dopušten, rješenjem od 12.07.2021.godine, naložio je predlagaču da uplati novčana sredstva na ime predujma finansiranja troškova prethodnog postupka radi utvrđivanja uslova otvaranja stečajnog postupka.

Predlagač je dana 21.07.2021.godine dostavio sudu dokaz o uplati predujmljenih sredstava za finansiranje prethodnog postupka.

Na osnovu dokumentacije priložene uz prijedlog za otvaranje stečajnog postupka i to: Odluka o prestanku rada društva i pokretanju stečajnog postupka od 15.02.2021..g., Izvod iz Centralne banke da je račun blokiran od 28.05.2021.godine, Aktuelni izvod iz sudskog registra od 15.02.2021.godine, Z.K. izvadci broj: 5756 k.o. Lukavac, 3397 k.o. Lukavac i 1383 k.o. Lukavac, Informacija od strane FIA-a od 24.06.2021.godine, predlagač je učinio vjerovatnom platežnu nesposobnost, te postojanje imovine na strani dužnika.

Na ročištu za saslušanje stečajnog dužnika od 12.07.2021.godine za predlagača je pristupio punomoćnik Sead Agić, advokat iz Tuzle, a za dužnika nije pristupio zakonski zastupnik Davorin Sadar iz razloga što je isti po izjavi punomoćnika predlagača preminuo još 2013.godine, a nije imenovan novi zakonski zastupnik, zbog čega nije provedeno saslušanje stečajnog dužnika.

Punomoćnik predlagača je izjavio da ostaje kod prijedloga za otvaranje stečajnog postupka, te kao razlog ističe platežnu nesposobnost društva i da isto nije u stanju izvršavati svoje dospjele i potraživane obaveze plaćanja u dužem vremenskom periodu. Računi dužnika su blokirani, a što je vidljivo iz Izvoda Centralne banke od 28.05.2021.godine. Društvo nema zaposlenih radnika, direktor društva je preminuo, a društvo nema ni sjedište. Što se tiče obaveza društvo ima neizmirene obaveze kako prema državi tako i prema drugim povjeriocima, kao i po osnovu kreditnih zaduženja prema više banaka. Što se tiče imovine društvo ima nepokretne imovine, al je ista pod hipotekom banaka. Osnivač CPM Maribor nikada nije obaviješten da se protiv dužnika CPM BH vodi bilo kakav sudski postupak.

Na osnovu podnesene dokumentacije sud nije u mogućnosti da sam procijeni postojanje svih neophodnih uslova koje Zakon predviđa za otvaranje stečajnog postupka, te se donosi rješenje o pokretanju prethodnog postupka radi utvrđivanja uslova za otvaranje stečajnog postupka nad dužnikom, temeljem odredbe člana 14. stav 1. Zakona o stečajnom postupku („Sl.novine FBiH“, br.29/03., 32/04. i 42/06.).

Odluka iz stava 3. ovog rješenja donesena je temeljem odredbe člana 16. Zakona o stečajnom postupku, a nakon što je utvrđeno da privremeni stečajni upravnik ispunjava uslove za imenovanje utvrđene odredbom člana 23. Zakona o stečajnom postupku.

Na osnovu navedenog, temeljem citiranih odredbi zakona, sud je odlučio kao u izreci rješenja.

STEČAJNI SUDIJA

Antonela Đaković

POUKA O PRAVNOM LIJEKU:

Protiv ovog rješenja dozvoljena je žalba u roku od 8 (osam) dana, računajući od dana prijema rješenja. Žalbu mogu uložiti dužnik i privremeni stečajni upravnik. Žalba se podnosi Kantonalnom sudu u Tuzli, putem ovog suda, u dva primjerka. Žalba stečajnog dužnika ne odlaže izvršenje rješenja.